



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o utvrđivanju posebnog značaja za Grad Sarajevo
za Udruženje POMOZI.BA
(Prijedlog)

Predlagač: Gradonačelnica
Obrađivač: Gradska služba za lokalno poslovanje

Sarajevo, juli 2024. godine

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), kao i na osnovu člana 8. stav (1) Odluke o načinu sticanja statusa udruženja i fondacija od posebnog značaja za Grad Sarajevo („Službene novine Kantona Sarajevo“, broj 51/21), Gradsko vijeće Grada Sarajeva, na __. sjednici održanoj dana __. __. 2024. godine, donijelo je:

(Prijedlog)

**Odluku
o utvrđivanju posebnog značaja za Grad Sarajevo
za Udruženje POMOZI.BA**

Član 1.

Ovom odlukom utvrđuje se da je Udruženje POMOZI.BA od posebnog značaja za Grad Sarajevo, kao neprofitna humanitarna organizacija koja svojim djelovanjem pomaže socijalno ugroženim ljudima na području cijele Bosne i Hercegovine i šire, a što predstavlja vrijednosti od posebnog značaja za Grad Sarajevo.

Član 2.

Djelatnosti Udruženja POMOZI.BA finansirat će se iz sredstava Budžeta Grada Sarajeva, iznosom od 10.000,00 KM (slovima: deset hiljada, KM) za projekat „Restoran dobre volje“ kroz više budžetskih godina, odnosno dok Udruženje ispunjava opće i posebne uslove za sticanje statusa posebnog značaja za Grad Sarajevo, odnosno do prestanka statusa, u skladu sa Odlukom o načinu sticanja statusa udruženja i fondacija od posebnog značaja za Grad Sarajevo.

Član 3.

Nadzor nad provedbom Odluke vrši gradonačelnica Grada Sarajeva putem nadležne Službe.

Član 4.

Izmjene i dopune Odluke vrše se na način i po postupku za njeno donošenje.

Član 5.

Odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:
Sarajevo, __. __. 2024. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statuta Grada Sarajeva kojim je propisano da Gradsko vijeće donosi odluke, druge propise i opće akte i daje njihovo tumačenje, kao i u članu 8. stav (1) Odluke o načinu sticanja statusa udruženja i fondacija od posebnog značaja za Grad Sarajevo, čijom odredbom je, između ostaloga, utvrđeno da Gradsko vijeće Grada Sarajeva donosi konačnu odluku o utvrđivanju posebnog značaja za određeno udruženje ili fondaciju, na prijedlog gradonačelnice Grada Sarajeva.

RAZLOZI DONOŠENJA

Udruženje POMOZI.BA sa sjedištem u Sarajevu, obratilo se gradonačelnici Grada Sarajeva Zahtjevom za sticanje statusa udruženja od posebnog značaja za Grad Sarajevo, protokolisanim pod brojem 07-04-5101/24 od 29.06.2024. godine. Uz zahtjev su dostavljeni dokazi o ispunjavanju općih i posebnih uslova definiranih Odlukom o načinu sticanja statusa udruženja i fondacija od posebnog značaja za Grad Sarajevo.

Udruženje POMOZI.BA od svoj osnivanja 2012. godine pomoglo je više od milijun osoba kroz različite projekte i humanitarne akcije. Pomoć u zadovoljavanju osnovnih ljudskih potreba navedeno Udruženje pruža starim i nemoćnim osobama, samohranim majkama, porodicama bez stalnih primanja, djeci bez roditelja, osobama s invaliditetom, bolesnicima, migrantima itd. Za socijalno ugrožene kategorije društva prikupljaju i osiguravaju materijalnu pomoć, hranu, lijekove, higijenske proizvode, obuču, odjeću, namještaj, bijelu tehniku, kao i druge potrepštine. Novčano pomažu u liječenju teško oboljelih osoba, te pomažu i u stambenom zbrinjavanju ljudi u izuzetno teškom materijalnom stanju.

Ciljevi Udruženja su pružanje pomoći svim socijalno ugroženim kategorijama stanovništva u Bosni i Hercegovini, poticanje drugih na humanost, solidarnost i saradnju.

Trenutno Udruženje POMOZI.BA ima veći broj projekata koji su aktivni, na osnovu obima aktivnosti projekata i iznosa prikupljenih sredstava izdvaja se 6 projekata: Zemljotres u R Turskoj i Siriji, Obrok za sve/Restoran dobre volje, Jetimi iz Sirije, Pružanje finansijske pomoći za liječenje osoba s različitim vrstama bolesti, Projekt „Pomoć za Palestinu“ i Projekt „Grickalice“.

Gradsko vijeće Grada Sarajeva je na 39. sjednici usvojilo inicijativu vijećnika Vedada Deljkovića da se Udruženju POMOZI.BA u skladu s važećom Odlukom o uslovima i sticanju statusa udruženja i fondacija od posebnog značaja za Grad Sarajevo utvrdi status Udruženja od posebnog značaja, te je ista postala inicijativom Gradskog vijeća, broj: 01-02-GV-533-1/24 od 24.04.2024. godine.

U skladu s članom 8. stav (1) i stav (2) Odluke, Služba za lokalno poslovanje mišljenja je da Udruženje POMOZI.BA ispunjava opće i posebne uslove propisane Odlukom te predlaže da se Odluka o utvrđivanju posebnog značaja za Grad Sarajevo predloži Gradskom vijeću Grada Sarajeva na usvajanje, kojem će se Udruženje finansirati za Projekat „Restoran dobre volje“ u iznosu od 10.000,00 KM u narednim budžetskim godinama.

Zaposlenici navedenog udruženja svakodnevno priprema topao obrok i dostavlja ga na prag starijim, nepokretnim, bolesnim, slabim i socijalno ranjivim osobama. U njihovim kuhinjama

u Sarajevu, Travniku i Bihaću pripremaju i dostavljaju oko 1.000 obroka svaki dan, s posebnom pažnjom na njihovu kvalitetu.

Prvi restoran dobre volje otvoren je 2019. godine u Travniku. To je prvi restoran te vrste u Bosni i Hercegovini gdje socijalno ranjive osobe mogu besplatno jesti, gdje svaki naš građanin u potrebi ima priliku uživati u kvalitetnoj hrani u restoranskom okruženju.

Cilj im je osigurati da oni koji si to ne mogu sami priuštiti imaju priliku za kvalitetan, zdrav i nutritivno bogat obrok u ugodnom okruženju, bez osjećaja srama, neprijatnosti ili čekanja u redovima. Drugi Restoran dobre volje otvoren je u Bihaću 2020. godine, dok je treći otvoren u Sarajevu u februaru 2021. godine.

Projekat se realizira u Restoranu dobre volje u Starom Gradu u Sarajevu gdje korisnici mogu u restoranskom ambijentu konzumirati kvalitetan topli obrok. Osnovni cilj projekta „Restoran dobre volje” je bolesnim, starim i iznemoglim osobama bez skrbnika i mogućnosti pripremanja hrane obezbijediti barem jedan kvalitetan kuhani obrok dnevno,

Projekat ima i socijalnu dimenziju, jer korisnicima projekta, samcima, fizički i psihički oboljelim korisnicima se obrok isporučuje na kućnu adresu. Zaposlenici Udruženja POMOZI.BA koji im ostavljaju obrok nerijetko su jedina posjeta i spona sa vanjskim svijetom, vrlo često oni prepoznaju i potrebe korisnika za dodatnom pomoći mimo toplog obroka.

Najveći dio hrane za svakodnevno pripremanje toplih obroka se obezbijeduje putem donacija u vidu prehrambenih artikala, te donacijama donatora za kupovinu namirnica i artikala neophodnih za posluživanje i pakovanje hrane. Sama dostava toplih obroka zahtijeva značajne dodatne ljudske i materijalne resurse. Budžet projekta za tri mjeseca iznosi 45.000,00 KM.

Gradonačelnica je, u skladu sa odredbama Odluke o uslovima i načinu sticanja statusa udruženja i fondacija od posebnog značaja za Grad Sarajevo, uputila Gradskom vijeću Grada Sarajeva prijedlog da se za Udruženje „POMOZI.BA“ utvrdi status od posebnog značaja za Grad Sarajevo.

Cijeneci naprijed navedeno, kao i Mišljenje Gradske službe za lokalno poslovanje, 07-04-5101-1/24 i člana 8. stav (1) Odluke o uslovima i načinu sticanja statusa udruženja i fondacija od posebnog značaja za Grad Sarajevo te imajući u vidu činjenicu da humanitarno djelovanje Udruženja „POMOZI.BA“ doprinosi afirmaciji grada Sarajeva i Bosne i Hercegovine, što predstavlja vrijednosti od posebnog interesa i značaja za Grad Sarajevo, Gradsko vijeće Grada Sarajeva donijelo je ovu odluku.

FINANSIJSKA SREDSTVA

Finansijska sredstva za realizaciju ove odluke obezbijeduju se u Budžetu Grada Sarajeva.